



TIMOR-LESTE

Timor-Leste, iha Sudeste Aziátiku, hanesan mos nasaun foun ida iha mundu. Nia teritóriu kobre parte leste illa Timor nian, enklave Oe-Cusse Ambeno no illa Ataúro no Jaco. Nia área marítima nia luan ne'e dala hitu liu nia rai maran.

Timor-Leste tur iha parte nortoeste Austrália nian no iha pontu ne'ebé lorosa'e liu Indonézia nian, Estadu arkipélagu bo'ot liu iha mundu, Timor-Leste iha kedas Korál Triángulu nia fuan - ema konsidera hanesan rejaiaun ne'ebé ho biodiversidade marina bo'ot liu iha planeta ne'e, ne'ebé ita preziza prezerva no tau hanesan kestaun prioridade ida.

FRONTEIRAS MARÍTIMAS

Estabelese ita nia fronteiras marítimas permanente ne'e hanesan kestaun nasional nian ida ne'ebé fó mai ita direitu ba soberania kompleta no ita nia direitu tuir lei internasional no lei tasi nian. Estabelese fronteiras marítimas ne'e hanesan hakat dahuluk ba desenvolvimentu ita nia Ekonomia Azul nian no hodi kontrola ho diak liu no jere ita nia tasi no rekursu sira hotu iha tasi laran.

EKONOMIA AZUL

Hanesan nasaun illa ida, área marítima sira Timor-Leste nian ne'e iha rikusoim barak.

Importante tebetes atu ita hatene liu tan kona-ba ita nia rekursu tasi nian, atu hodi haburas desenvolvimentu sustentável nasaun nian no Ekonomia Azul. Rikusoim tasi nian ne'e proteje balansu ambiente no ekolójiku tasi nian, nune'e mos sustenta ita nia kreximentu sosial no ekonomia.

Timor-Leste nia Ekonomia Azul ne'e sei iha hela nia faze inísiu. Timor-Leste sei preziza hatene liu tan kona-ba nia rekursu tasi nia potensial tomak.

- Timor-Leste nia bé morna ne'e sai uma ba ahuruin tuan no furak tebetes balu iha mundu
- Conservation International konklui tiha ona katak bé hirak ne'e, liu-liu haleu Illa Ataúro ne'e, hanesan fatin ne'ebé halibur biodiversidade bo'ot liu iha mundu. Iha ikan oioin kuaze espésie 643 iha Timor-Leste. Peskiza ne'ebé halao iha tasi Ataúro nian hatudu katak ikan korál nian iha kuaze oin 252 iha kada fatin
- Ita nia tasi ne'e hanesan uma ne'ebé halibur ikan bo'ot tebes (setáseu) sira iha planeta
- Illa Ataúro hanesan dalan ba baleia azul hodi nani fali ba rai seluk
- Espésie setáseu 30 resin mak moris iha Timor-Leste nia bé laran, inklui baleia-ulun-kabuar, golfiñu-rotador, no espésie migratória sira hanesan baleia *humpback* no baleia azul
- Timor-Leste nia tasi ne'ebé furak tebes ne'e iha potensial bo'ot ba desenvolvimentu turizmu nian

Planu Desenvolvimentu Estratéjiku 2011 – 2030 / Governu nia Programa / Objektivu Desenvolvimentu Sustentável 14 / Ekonomia Azul

Iha Dezembru 2019 Governu Timor-Leste nomeia ba S.E. Kay Rala Xanana Gusmão – eis Prezidente Repúblika, eis Primeiru-Ministru no oras ne'e dadaun hanesan Xefe Negosiador ba Delimitasaun Fronteiras Marítimas – hanesan Governu nia Representante Espesial ba Ekonomia Azul, ne'ebé Gabinete Fronteiras Marítimas fó apoiu, ho objetivu atu koordena advokasia iha nível nasional no internasional kona-ba Ekonomia Azul, nune'e mos hodi lidera esforsu hodi promove no dezenvolve Ekonomia Azul.

Ida ne'e inklui, hamutuk ho buat selseluk, kampaña kona-ba edukasaun ambiental no kona-ba kombate degradasaun ambiental, nune'e mos desenvolvimentu estratéjia, programa, planu asaun, no parseria sira.

Saida mak ita halo tiha ona

- Ita implementa ona Política Zero Plástiku iha nasaun laran tomak
- Kria área marina protejida iha nasaun laran tomak
- Hakerek planu hodi estabelese parke marina nasional haleu illa Ataúro, hodi proteje korál tropikal sira ne'ebé hanesan uma ba biodiversidade bo'ot tebes iha mundu

Tara Bandu – Toman Tradisional nian

Hori uluk kedas Timoroan sira rekoñese importansia no potensial no valor tasi nian ba sira nia moris, nu'udar fatin hodi hetan hahan no osan.

Nesiedade hodi proteje tasi ne'e nia abut metin tiha ona iha Timoroan sira nia kultura. Tara Bandu ne'e fiar iha espíritu anemizmu ne'ebé comunidade lokal sira uza, liu hosi lei no kostume tradisional, hodi jere no proteje sira nia rekursu natural.

Ita nia dezafiu

- Saúde tasi Timor-Leste nian ne'e monu iha klasifikasaun 172 husi nasaun no teritóriu 221 (tuir Relatóriu Nasional kona-ba Estadu Tasi Timor-Leste nian)
- Peska ilegal
- Ekosistema marina no ita nia korál sira ne'e mohu ba bebeik
- Mudansa Klimátika
- Seguransa marítima

Timor-Leste halo esforsu tomak hodi servisu hamutuk ho parseiru sira, atu nune'e bele lao tuir prátika diak liu sira hodi hametin baze desenvolvimentu sustentável Ekonomia Azul nian.

“Hau nia Tasi, hau nia Timor”

TIMOR-LESTE

Área: 15.410 km²
Populasaun: 1.3M

Hau nia Tasi,
hau nia Timor

Aprende tan @ www.gfm.tl ka kontaktu:
Gabinete Fronteiras Marítimas
Konsellu ba Delimitasaun Definitiva ba Fronteiras Marítimas
Governu Demokrátika Repúblika Timor-Leste
e: info@gfm.tl tel: +670 7742 5544



Gabinete
Fronteiras
Marítimas